

Bopaki bo Kholisang ka ho Fetisisa



SABATHA MANTSIBOEA

Bakeng sa Boithuto ba Beke Ena Bala:

Johanne 11:51, 52;Ba-Ef. 2:13-16; 2 Ba-Kor. 5:17-21;Ba-Ef. 4:25-5:2;Ba-Roma 14:1-6;Liketso 1:14.

Teman'a Khopolo:

“O na a sa bue joalo a iqalla, empa, kahobane e ne e le moprista e moholo ka selemo seo, a profeta hore Jesu o tsoanetse ho tla shoela sechaba. E seng sechaba feela, empa le hore a bokelle hammoho bana ba Molimo ba qhalaneng”(Johanne 11:51, 52).

Beke e fetileng re ithutile kadoo bonngoe bo bonahatsoang ke molaetsa o tsoanang, o tsebameng holim'a Jesu e le Mopholosi le linnete tsa Lengolo tse lokelang ho tiisoa nakong ea bofelo. Re seo re leng sona ka lebaka la molaetsa oo Molimo a re neileng oona le pitso eo re nang le eona ea ho o phatlaletsa lefatše. Bekeng ena, re talima bonngoe bo bonahalang ba kereke ha bo iponahatsa maphelong a letsatsi le letsatsi a Bakreste le thomong ea kereke. Ho ea ka Jesu, kereke ha e phatlalatse molaetsa oa Molimo oa poloko le poelano feela. Bonngoe ba kereke le bona ke sesupo sa bohlokoa sa poelano eo. Lefatšeng le potiloeng ke sebe le borabele, kereke e ema e le bopaki bo bonahalang ba mosebetsi le matla a Krete a pholosang. Kantle ho bonngoe le kopano ea kereke ka ho fana ka bopaki bo tsoanang, ho ne ho tla ba thata hore matla a pholosang a Sefapano a bonahale lefatšeng lena. “Bonngoe le Krete bo thea tlamo ea bonngoe ba e mong ho e mong. Bonngoe bona ke bopaki bo kholisang ka ho fetisisa ho lefatše ka borena le bokhabane ba Krete, le ka matla a Hae a ho tlosa sebe.” —Ellen G. White Comments, *The SDA Bible Commentary*, pok. 5, leq. 1148.

**Ihute thuto ea beke ena ho lokisetsa Sabatha sa la 1 Tšitoe.*

Tlas'a Sefapano sa Jesu

Joalo ka litlhohonolofatso tse ling tsa semoea tseo Molimo a li fang batho ba Hae, bonngoe ba kereke le bona ke neo ea Molimo. Bonngoe ha se ntho e etsoang ke batho ka maleke a rona, mesebetsi e metle, le merero. Taba ea mantlha ke hore, Jesu Kreste o bopa bonngoe boo ka lefu la Hae le tsoho. Ha re sebelisa ka tumelo lefu la Hae le tsoho ka kolobetso le tšoarello ea libe tsa rona, ha re ba 'moho kopanong ea boena, le ha re hasetsa lefatše molaetsa oa manyeloi a mararo, re kopanong le Eena le rona hammoho e mong ho e mong.

Bala Johanne 11:51, 52 le Ba-Efese 1:7-10. Ke ketsahalo efe bophelong ba Jesu eo e leng motheo oa bonngoe har'a Baleti ba Letsatsi la Bosupa?

“O [Kaiafa] na a sa bue joalo a iqalla, empa, kahobane e ne e le moprista e moholo ka selemo seo, a porofeta hore Jesu o tšoanetse ho tla shoela sechaba. E seng sechaba feela, empa le hore a bokelle hammoho bana ba Molimo ba qhalaneng” (Johanne 11:51, 52). Ho makatsa ha ka kang hore e be Molimo o ile oa sebelisa Kaiafa ho hlalosa lefu la Jesu, leha Kaiafa a n'a sa tsebe hore na o etsa'ng ha a ahlolela Jesu lefu. Hape moprista o ne a sa tsebe na polelo ea hae e tebile hakae. Kaiafa o ne a lekanya hoba o mpa a etsa polelo ea sepolotiki feela. Leha Johanne a e sebelisitse ho senola 'nete ea motheo ka lefu la Jesu sebakeng sa bohle ba tšepelang ba Molimo, bao ka letsatsi le leng ba tlang ho bokana “hammoho ho ba ntho e le 'ngoe.” Hohle ho hong hoo ebang re lumela ho hona re le Baleti ba Letsatsi la Bosupa, hore na ke molaetsa ofe oo re o phatlalatsang re le bang, motheo oa bonngoe ba rona o holim'a ho amohela ha rona hammoho lefu la Jesu sebakeng sa rona. 'Me, ho feta moo, re boela re e-ba le boiphihlelo ba bonngoe bona ka kolobetso. “Hobane bohle re bara ba Molimo ka ho lumela ho Jesu Kreste. Hobane lona bohle ba kolobelitsoeng ho Kreste, le apere Kreste” (Ba-Gal. 3:26, 27). Kolobetso ke tlamo e 'ngoe eo rona re le Baleti re e arolelanang hammoho, joaloka ha e tšoantša tumelo ea rona ho Kreste. Re na le Ntate a le mong; ka mokhoa o joalo, kaofela re bara le barali ba Molimo. Re na le Mopholosi a le mong eo re kolobetsoang lefung le tsohong ea Hae (Ba-Roma 6:3, 4).

Har'a liphapano tse ka bang teng tsa meetlo, merabe, le lipolotiki har'a rona re le Baleti ba Letsatsi la Bosupa, hobaneng ha tumelo ea rona e tšoanang ho Jesu e lokela ho koahela likhaohano tseo?

Bosebeletsi ba Poelano

Lefatše la rona lona kannete le tsejoa ka ho hloka taolo, matšoenyeho, lintoa, le likhohlano. Lintho tse na kaofela li ama maphelo a rona boemong ba motho ka mong, ba motse, le ba naha. Ka nako tse ling ho ee ho bonahale e ka maphelo a rona kaofela ha oona a khohlanong. Empa likhaohano le ho hloka taolo ha ho na ho ba teng ka ho sa feleng. Molimo o letšolong la ho tlisa bonngoe ba maholimo le mafatšeng. Leha sebe se tlisitse pherekano, leano la Molimo la poelano le tlisa khotso le botlalo. Ho Ba-Efese 2:13-16, Pauluseo beha litšiea tse bontšang kamoo Krete a ileng a etsa kateng ho tlisa khotso har’a balumeli: ka lefu la Hae sefapanong Jesu o entse ba-Juda le Balichaba sechaba se le seng ’me a rapalatsa marako a merabe le borapeli a neng a ba arotse. Haeba Krete a tsebile ho etsa sena ka ba-Juda le Balichaba mongoa-holong oa pele, a ka rapalatsa marako a mefuta, merabe, le meetlo ha ka kang a arolang batho kahare ho likereke tsa rona kajeno? ’Me ho tloha sethathong sena, re ka fihlela lefatšeng.

Ho 2 Ba-Korinthe 5:17-21, Pauluse o bolela hore ho Krete re libopuo tse ncha, tse boelantsoeng le Molimo. Ha ho le joalo, bosebeletsi ba rona lefatšeng lee ke bofe? Re ka etsa liphetoho life metseng ea rona re le kereke e kopaneng?

Joalo ka libopuo tse ncha tsa Molimo, balumeli ba amohela bosebeletsi ba bohlokoa—bosebeletsi bo ntlha li tharo ba poelano. (1) Kereke ea rona e bopiloe ka balumeli bao ka nako e ’ngoe ba neng ba na le bora le Molimo empa, ka mohau o pholosang oa sehlabelo sa Krete, bao hajoale ba kopantsoeng le Molimo ke Moea o Halalelang. Re Masala, a bilelitsoeng ho phatlalatsa molaetsa oa mehla ea bofelo ho lefatše. Bosebeletsi ba rona ke ho mema ba ntseng ba na le bora le Molimo ho boelana le Molimo ’me ba ikopanye le rona thomong ea rona. (2) Kereke e boetse ke sechaba sa Molimo se boelaneng, e mong le e mong. Ho ba le kopano le Krete ho bolela hore re na le kopano e mong le e mong. Hona ha se feela boemo bo phahameng bo laba-labeloang; e lokela ho ba taba e bonahalang. Poelano ea e mong ho e mong, khotso le kutloano har’a baena le likhaitselike bopaki bo sa thekeseleng ho lefatše hore Jesu Krete ke Mopholosi le Molopolli oa rona. “ ’Seo bohle ba tla tseba hobane le barutuoa ba ka ka sona, ke ha le ratana’ ” (Johanne 13:35). (3) ka bosebeletsi bona ba poelano, kereke e joetsa maholimo le mafatše hore leano la Molimo la topollo ke la ’nete ’me le na le matla. Ntoa e kholo e holim’a Molimo le semelo sa Hae. Leha kereke e hlaolela bonngoe le poelano, maholimo le mafatše a bona bohlae bo sa feleng ba Molimo tšebetsong (sheba Ba-Ef. 3:8-11).

Bonngoe bo Phelang

Ka 1902, Ellen G. White o ile a ngola hore: “Seo Kreste a neng a le sona bophelong ba Hae lefatšeng lena, ke seo Mokreste e mong le e mong a lokelang ho ba sona. Ke mohlala oa rona, e seng feela bohloeking ba Hae bo se nang letheba, empa le mamellong ea Hae, bonolo, le semelo sa Hae se khahlang.”—Ellen G. White, in *Signs of the Times*, Phupu 16, 1902. Mantsoe ana a hopotsa boipiletso ba Pauluse ho Ba-Filipi: “Le fele le be le pelo e bileng ho Jesu Kreste” (Ba-Fil. 2:5).

Bala Ba-Filipi 4:25-5:2 le Ba-Kolose 3:1-17,e be u araba lipotso tsena tse peli: Ke likarolong life tsa maphelo a rona tseo ka kotloloho re memeloang ho bontša bolateli ba rona ho Jesu? Ke joang re lokelang ho ba lipaki tsa evangeli ea Jesu maphelong a rona sechabeng?

Ho na le litemana tse ngata tsa Lengolo tse memelang Bakreste ho latela mohlala oa Jesu le ho ba bopaki bo phelang ba mohau oa Molimo ho ba bang. Hape re bilelitsoe ho etsa batho hantle (Matt. 7:12); ho jarelana liphahlo (Ba-Gal. 6:2); ho phela ka bonolo le ho tsepamisa maikutlo semoeng kahare ho e-na le bokhabo ba kante (Matt. 16:24-26; 1 Pet. 3:3, 4); le ho latela litloaelo tsa bophelo bo botle (1 Ba-Kor. 10:31).

“Baratuo, kea le khothatsa joalokaha le le basele le baeti, ke re: Tšabang litakatso tsa nama, tse loantšang moea. Le be le motsamao o motle har’a bahetene, hore tabeng tseo ba le sebang ka tsona, joaloka hola le le lisenyi, ba rorise Molimo mohla o ba etelang, ha ba bontšisa mesebetsi ea lona e metle” (1 Pet. 2:11, 12). Ke hangata ha kae re atisang ho halala bohlokoa ba semelo sa Bokreste ho ba re talimileng? Mamello e bonahatsoang linakong tsa khopiso, bophelo bo nang le boitšoaro har’a liqhoebeshano le likhang, moea o bonolo ho arabela mantsoe a ho hloka mamello a hlabang, ke matšoao a moea oa Jesu oo re biletsoang ho o etsisa. Ha Baleti ba Letsatsi la Bosupa ba sebeletsa hammoho lefatšeng le sa utloisiseng semelo sa Molimo, re fetoha matla a isang botleng le tlotlisong ea Molimo. Joaloka baemeli ba Kreste, balumeli ha ba lokela ho tsejoa feela ka boitšoaro ba bona bo botle empa le ka thahasello ea bona boiketlong ba ba bang. Haeba boiphihlelo ba rona ba Bokreste e le ba ’nete, bo tla ithahisa me bo ame lefatše. Sehlopha se kopaneng sa balumeli se bontšang semelo sa Kreste ho lefatše se tla fetoha bopaki bo matla e le kannete.

U fana ka bopaki bo joang ho ba bang? E mong a ka fumana eng bophelong ba hau e ka etsang hore a batle ho latela Jesu?

Bonngoe Har'a Phapano

Ho Ba-Roma 14 le 15, moapostola Pauluse o arabela litaba tse neng li arola kereke e Roma ka matla. Karabo ea hae litabeng tsena e bile ho memela ba-Roma ho bontša mamellano le mamello e mong ho e mong. 'Me ba se arole kereke ka litaba tseo tse tšoenyang. Re ka ithuta eng keletsong ee ea hae?

Bala Ba-Roma 14:1-6. Ke litaba life tsa keello tse neng li bakela litho tsa kereke Roma ho ahlolana ho e-na le ho ba le kopano ea boena?

Ho ka etsahala hore e be litaba tsena li ne li amana le meetlo ea se-Juda ea ntho tse litšila. Ho latela Pauluse, lintho tsena e ne e le “ho fapanyetsana litaba ka khang” (Ba-Roma 14:1), a bontša hore e ne e se litaba tsa pholoho empa e ne e le litaba tsa maikutlo tse neng li lokela hore e be li tlohelletsoe keello ea motho ka mong. (Sheba Ba-Roma 14:5.)

Likhang tsena li qalile ka mofuta oa lijo o lokelang ho jeoa. Ho ja liphoofole tse hanetsong ho Levitike 11 e ne e se eona taba eo Pauluse a sebetsanang le eona mona. Ha ho na bopaki ba hore Bakreste ba pele ba ile ba qalella ho ja nama ea kolobe kapa liphoofole tse ling tse litšila nakong ea Pauluse, 'me rea tseba hore Petrose ha a ka a ja lijo tse joalo (sheba Liketso 10:14). Hape, taba ea hore ba fokolang ba ne ba ja meroho feela (Ba-Roma 14:2) le hore khang e ne e kenyelletsa le lino (Ba-Roma 14: 17, 21) e bontša hore khathatseho e ne e le holim'a meetlo ea lintho tse leng litšila. Sena se pakahatsoa ho feta ke lentsoe mpe (koinos), le sebelisitsoeng ho Ba-Roma 14:14. Lentsoe leo le sebelisitsoe phetolelong ea se-Gerike sa khale sa Testamente ea Khale ho supa liphoofole tse mpe, e seng liphoofole tse sa hloekang tsa Levitike 11. Hantle ho ne ho e-na le batho phuthehong ea ba-Roma ba neng ba hana ho ja lijo tse kopanetsong ke baena hobane ba ne ba sa kholiseha hore li apheilo hantle kapa hore ha lia hlabele litšoantšo. E ntse e le taba e tšoanang ka ea poloko ea matsatsi. Taba ena e ne e sa bue ka poloko ea Sabatha ea beke le beke, joalokaha re tseba hore Pauluse o ne a e boloka kamehla (Liketso 13:14, 16:13, 17:2). E tlameha e be taba ena e ne e bua ka matsatsi a se-Juda a mekete le boitimo. Sepheo sa Pauluse litemaneng tsena ke ho khothaletsa mamellano ho ba bolokang meetlo ena ka tieo le ka letsoalo le hloekileng ha feela ba ne ba sa nahane hore ke tsela ea ho fumana pholoho. Bonngoe har'a Bakreste bo iponahatsa ka mamello le mamellano ha re sa lumellane ka litaba kamehla, haholo-holo ha e se tsa bohlokoa tumelong ea rona.

Sehlopheng, botsa potso ena: a na ho na le seo re se lumelang, seo re se etsang, re le Baleti ba Letsatsi la Bosupa seo bohle ba ipitsang Baleti ba sa lokeleng ho lumela kapa ho tsitlallela ho sona?

Bonngoe Thomong

Bapisa boikutlo ba barutuoana nakong ea Selallo sa Morena ho Luka 22:24 le boo ba neng ba e-na le bona nakoana pejana ho boiphihleo ba Pentekonta ho Liketso 1:14 le 2:1, 46. Ke eng e ileng ea etsa phapano e kaalo maphelong a bona?

Ho Liketso 1:14 le 2:46, poleloana “pelo e le ’ngoe” hape e bolela “ho tiisetša ka pelo e le ’ngoe.” Sena se tlisitsoe ke ho ba sebakeng se le seng ha bona, ba batla phethahatso ea tšepiso ea Jesu, ea ho romela Motšelisī, ka thapelo. Ha ba ntse ba letile, ho ne ho ka ba bonolo ho bona ho qalella ho tšoaana liphoso. Ba bang ba ne ba ka supa ha Petrose a ne a latola Jesu (Johanne 18:15-18, 25-27) le ho se lumele ha Thomase hore Jesu o tsohile (Johanne 20:25). Ba ne ba ka hopola kopo ea Johanne le Jakobo ha ba ne ba kopa litulo tse phahameng ka ho fetisisa ’musong oa Jesu (Mareka 10:35-41), kapa hore Mattheu e ne e le molekhetso ea neng a nyatsuoana (Matt. 9:9). Leha ho le joalo, “Matsatsi ana a boitokiso e ne e le matsatsi a ho lekola lipelo ka botebo. Barutuoana ba ile ba utloa bohloki ba bona ba semoea ’me ba lla ho Morena ho ba nea tlotso e tla ba lokisetsa mosebetsi oa ho pholosa meea. Ba ne ba sa ikopelle lehlohonolo. Ba ne ba imetsoe ke boima ba pholoho ea meea. Ba ile ba hlokomela hore evangeli e lokela ho isoa lefatšeng, ’me ba ile ba kopa matla a Jesu joalokaha a ne a tšepisitse.”—Ellen G. White, *The Acts of the Apostles*, leq. 37. Kopano ea boena ea barutuoana le ho tiisetša thapelong ho ile ha ba lokisetsa boiphihlelo bo fanang ka matla ba Pentekonta. Ha ba ntse ba eketsa ho atamela ho Molimo, ’me ba behella kathoko liphapang tse teng har’a bona, barutuoana ba ile ba lokisoa ke Moea o Halalelang ho ba lipaki tsa tsoho ea Jesu tse se nang letsoalo le tse tiileng. Ba ne ba tseba hore Jesu o tšoaetse mefokolo ea bona e mengata, ’me sena se ile sa ba nea khotatso ea ho hatela pele. Ba ne ba tseba seo Jesu a ba etselitseng sona maphelong a bona. Ba ne ba tseba tšepiso ea poloko e fumanoang ho Eena, ’me ka mokhoa o joalo “Thahasello ea balumeli e ne e le ho bonahatsa semelo se tšoaanang le sa Jesu le ho sebeletsa ho atolosa ’muso oa Hae.”—Leqephe la 48. Ha ho makatse ke hona hore Molimo o ile a tseba ho etsa lintho tse matla ka bona. Ke thuto e matla ha ka kang bakeng sa rona re le kereke kajeno!

Ho bonolo kamehla ho fumana lintho tse fosahetseng maphelong a batho ba bang. Re ka ithuta joang ho behella kathoko liphoso tsa ba bang, molemong oa mosebetsi o moholo ka ho fetisisa oa ho etsa thato ea Molimo hammoho re le kereke?

Ho Ithuta Haholoanyane:

Ellen G. White, “Unity in Diversity,” maq. 98-103, ho *Evangelism*. Qotsulo e latelang e bontša kamoo kereke ea pele, e kopane ho Kreste, e tsebileng ho boloka bonngoe le har’a liphapang tse neng li le teng har’a eona, ’me ka mokhoa o joalo ea e-ba bopaki bo matla ho lefatše. “Kahare ho kereke, Lengolo le bontša kamoo Moea o Halalelang o ileng oa tataisa kereke ea pele tšebetsong ea eona ea ho nka liqeto. Taba ena e etsoa bonyane ka litsela tse tharo tse nyalanang: litšenolo (mohlala, Kornele, Ananiase, Filipi; hape mohlomong le ka lotho, Lengolo (kereke e ile ea fihlela qeto eo ho eona ho ileng ha sebelisoa Lengolo), le tumellano (Moea o ne o sebetsa kahare ho phutheho, ka tsela e sa totobalang, o bopa tumellano ka lipuisano le boithuto boo qetellong ea bona kereke e neng e hlokomela hore Moea o ntse o sebetsa kahare ho eona). Ho bonahala e ka ha ho ne ho na le likhang tsa moetlo, tsa thuto, le tsa litaba tsa Molimo, har’a phutheho ea balumeli, Moea o Halalelang o ne o sebetsa ka tumellano ho fihlela liqeto. Tšebetsong ena, re bona boikitlaetso ba phutheho ea balumeli e seng feela ba baetapele, le bohlokoa ba thapelo bakeng sa temoho. Tataiso ea Moea o Halalelang e utloahala har’a phutheho eohle ka kutloisiso ea bona ea Lentsoe la Molimo, boiphihlelo ba phutheho le litlhoko tsa eona, le ka boiphihlelo ba baetapele ba eona ha ba sebeletsa. Liqeto tse fapaneng tsa kereke li ile tsa etsoa ka tataiso ea Moea o Halalelang moo teng, Lengolo, thapelo, le boiphihlelo e neng e le lintlha tsa ho talimisisa thuto ea Molimo.”—Denis Fortin, “The Holy Spirit and the Church,” in Ángel Manuel Rodríguez, ed., *Message, Mission, and Unity of the Church*, maq. 321, 322.

Lipotso tsa Puisano:

1. Sehlopheng, le ke le khutlele karabong ea lona ea potso ea Laboraro ea kamoo re etsang qeto ea lithuto le litloaelo tseo re reng ke tsa bohlokoa ho rona re le Baleti ba Letsatsi la Bosupa le tseo e seng tsa bohlokoa.
2. Re lokela ho amana joang le Bakreste ba liphutheho tse ling bao, joaloka rona, ba lumelang lefung le tsohong ea Jesu?

Kakaretso: Bopaki bo kholisang ka ho fetisisa ba bonngoe ke ha baena le likhaiseli ba rata joalokaha Jesu a ratile. Tšoarello ea libe tsa rona le pholoho eo re nang le eona hammoho re le Baleti ke tsona litlamo tse tsoang pele tsa kopano ea baena. Ho Kreste, ka mokhoa o joalo re ka bontša lefatše bonngoe ba rona le bopaki ba tumelo ea rona e tsoanang. Ha rea biletsoa ho etsa ho fapaneng.